

L'alp Blengias : in'alp e ses proprietaris naven dil 15avel entochen il 20avel tschentaner

Autor(en): **Cathomen, Rica-Maria**

Objektyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **77 (1992)**

Heft 4

PDF erstellt am: **11.09.2024**

Persistenter Link: <https://doi.org/10.5169/seals-881652>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

L'alp Blengias



In'alp e ses proprietaris
naven dil 15avel
entochen il 20avel
tschentaner


Rica-Maria Cathomen

Sco il tetel di hai jeu vului mussar, tgei proprietaris che l'alp Blengias ha giu el decuors dils davos tschun tschentaners. Cunquei che jeu hai priu in tal grond spazi da temps eis ei stau pusseivel da retschercar e perscrutar la historia da quei terren naven dall'emprema menziun entochen la pli davosa da 1990. La finamira da quell'entira lavur savess'ins divider en treis puncts:

1. Rimnar inagada tut il material ch'ei avon maun davart l'alp Blengias, elaborar ils documents e cheutras impedir la sperdita d'impurtonts documents aunc mai publicai.
2. Mussar l'impurtonza ch'in'alp veva duront biars tschentaners e tgei differentas gruppas d'interess che sestentavan per quei terren.
3. Perscrutar in camp che stat en stretg connex cun mes perdavons ed aschia contribuir enzatgei alla historia dall'atgna famiglia.

En emprema lingia sundel jeu sespruada da valetar tut ils documents privats ord possess dalla famiglia Blumenthal-Riedi da Falera. Per buca piarder il fil tgietschen hai jeu era retschercau en differentes archivs e naturalmein consultau ina vasta paletta da litteratura. Mia lavur sebasa pia per gronda part sin documents e scartiras ord possess privat ni ord archivs. La plipart dallas informaziuns partenent il 20avel tschentaner haiel survegniu dil cautegia Gion Blumenthal da Falera.

Segir san ins buca veser la historia d'in terren a moda isolada. Buca meins impurtont eis ei era stau da retschercar las premissas geograficas, historicas e naturalmein era l'influenza sociala.



Ina muntada extraordinaria vevan cunzun ils pass entadem la val Lumnezia, ina tut speciala il pass dalla Greina. L'impurtonza dil pass dalla Greina semuossa gia el temps prehistoric, en connex culla collina da Crestaulta/Surin. Il pass salva denton sia posiziun tochen ditg viaden el 19avel tschentaner, cun quei che la Lumnezia sura s'orientava viers il sid e buca viers il nord.

Pervia dil viv transit sur il pass dalla Greina enconuschevan ils habitonts dalla Lumnezia, sco era quels dalla val Blenio,

dètg bein ils territoris da tschella vart dil cuolm. Ils purs dalla Lumnezia ein tilai tochen la fin dil 19avel tschentaner cun lur biestga allas fieras da Ligiaun, Giubiastg e Milaun. Ils Tessines e Talians da lur vart marcadavan naturalmein era cun lur products e vendevan els ella Lumnezia. El 15avel tschentaner entscheiva l'expansiun dils vischins da Daigra (Aquila) per dapli terren d'alp da tschella vart dil cuolm. Motiv per quella expansiun ei la surpopulaziun ella val Blenio. Ils purs ein sfurzai d'encurir niev territori per alpegiar lur muvel. Ed il pli cumadeivel ei bein da tilar culla biestga sin territori grischun bein enconuschent.

La cumpra dall'alp 1478

Ils vischins d'Aquila han giu la caschun da cumprar l'alp Blengias igl onn 1478 dils vischins da Vanescha. Igl emprem ei l'alp Blengias mo vegnida dada a tscheins. Ins astga supponer che buca la munconza da daners seigi stau il motiv da vender il terren, mobein plitost igl interess dils da Aquila per l'alp.

Ellas brevs da pègn ni da vendita vegnan ins adina confruntaus cun ina entira retscha da vendiders e vendidras. Las famiglias da Vanescha eran da quei temps fetg numerosas. Aschia enconuschein nus ord la pergameina da 1478 endisch affons dil Tschann da Vanescha. Els vegnan tuts numnai cun num ella brev da vendita. Quei grond diember d'affons ei segir era stau in motiv per certins da Vanescha da vender ton terren d'alp.

Ils praus entuorn il vitget alpin, cun lur raccolta plitost magra ed ils unviarns zun ruhs devan alla veta siaden en ina val solitaria in character d'isolaziun aunc pli grev. Ils unviarns eran buca mo ruhs, mobein era liungs, il temps da raccolta cuorts e duront quei liung temps da neiv e glatsch stuevan ils habitonts senutrir da quei ch'els vevan en tgaminada. Ina gronda part da quellas famiglias numerosas ei per quei stada sfurzada d'emigrar. Quei semanifestescha cunzun el fatg che Vanescha vegn numnaus l'emprema gada 1447 e la davosa gada gia 1619.

Dispetas

Ils Aquilès stuevan far in liung viadi avon ch'ei arrivien sin lur pastira d'alp en Blengias. La via per contonscher quei terren era liunga e stentusa. Naven dad Olivone vevan ins da prender la via tras la cavorgia da Sosto siado tochen Campo nua ch'ins saveva decider denter duas pusseivladads da cuntinuar il viadi. Dad ina vart savevan ins ir tras la val Camadra sur la Scaletta, ni sul Motterascio tiel Crap la Crusch (2259 m.s.m.) e giuaden sil Plaun la Greina. Naven da cheu mavan ins buca la liunga senda sur il pass Diesrut (2428 m.s.m.), mobein tras la val Canal e siado sur il passadi gest sper il péz Zamuor ora. Sin quella moda contonschevan ils vischins da Semione beinspert lur alps Zamuor e Diesrut, ferton che quels dad Aquila semenavan dalla costa dretga vi e sil Fil da Blengias en lur alp Blengias. Ina via alternativa per arrivar sin bunamein medema altezia ell'alp fuva la senda sur la Fuorcla da Blengias. Cunquei ch'ils Aquilès fussen stai sfurzai dad ir en quei cass sur il glatscher dil Terri, ei quella varianta probablamein buca vegnida duvrada savens.

El 15avel tschentaner dat ei entginas dispetas denter ils vischins da Semione ed Aquila. Il cussegl dalla val Lumnezia sto intermediar in'emprema gada 1473 denter las duas vischnaucas. Igl interess per territori el Grischun era daventaus gronds. Il motiv dalla carplina ei l'alp Blengias. La partida da Semione cumpra en consequenza la mesadad dallas brevs da pègn: l'alp e las duas tegias vegnan partidas si denter las duas vischnaucas. Plinavon vegn era concludiu che neginas dallas partidas astgien far donns sil terren da l'auter e quei ni da primavera, stad ni d'atun.



Blengias Sura, 1946

Enzatgei dil pli impurtont ei segir che omisduas vischnauncas dueien haver il dretg da duvrar il trapass tras l'alp Canal che schai davos Vanescha ed ei ina dallas vias che meina ell'alp Blengias. Quei dretg da trapass provochescha beingleiti in'ulteriura dispeta 1479 denter las duas vischnauncas.

Ils accusaders da Semione pretendan che tenor la cunvegrientscha da 1473 appartegni la mesadad dall'alp Blengias ad els, cunquei ch'ei hagien in dretg da cumpra correspondent da quei onn. La dertgira dalla Lumnezia proclamescha la suandonta sentenza: «La cumpra dils da Aquila ei valeivla. Las brevs dils vischins da Semione cuntegnan mo il pègn ed ein en quei mument senza valur, quei che partegn il dretg da cumpra dils d'Aquila.» Aschia vendan ils da Semione als Aquilès certs dretgs da passar tras l'alp Canal, cunquei ch'ils vischins d'Aquila vevan gia giu cumprau l'alp Blengias 1478.

Bucatonmeins arrivan quellas dispetas era neu dil fatg ch'ils dretgs d'alp eran da gliez temps dètg cavistrai. La plipart dils proprietaris d'alps vevan, entras la cumpra da terren, aunc survegniu gratuitamein in adossament da dretgs specials da tuttas sorts. Enconuschents fuvan denter auter: il dretg da buentar e da passadi, ils dretgs da pascular avon la cargada ni suenter la scargada, il dretg da lenna, il dretg d'untgida sco era la prescripziun da pagar certas contribuziuns dallas alps alla baselgia ed als paupers. En connex cull'alp Blengias era ed ei cunzun il dretg d'untgida da gronda impurtonza. Ils Aquilès duvravan per lur viadi ell'alp dus dis. En cass da nevadas ni malauras possedevan els il dretg d'untgida sin ina pastira dils da Vanescha (la Rofna).



Las stallas da Blengias Sut, 1946

La vendita dall'alp

Cul temps svanescha igl interess per quei terren d'alp ed ils Aquilès vendan l'alp Blengias alla famiglia Demont da Vella. Quella munconza d'interess deriva era dil fatg ch'ils purs ella val Blenio ed egl entir Tessin sedrezzan adina dapli tenor ils giavischs economics dalla Lombardia. Buca senza raschun va l'alp Blengias enta maun als Demonts.

Ils habitonts da Vanescha che vevan vendiu 1478 l'alp als Aquilès vevan pretendiu ch'ils vischins ord la val Blenio, en cass d'ina vendita dil terren, stoppien vender quel puspei ella Lumnezia. Tgei onn e per tgei summa che l'alp Blengias ei vegnida vendida ei buca stau pusseivel d'eruir. Igl ei denton segir ch'ils proprietaris dall'alp Blengias, da niev la famiglia Demont da Vella, eran obligai da dar in

tscheins annual alla baselgia da sogn Vincenz a Pleiv/Vella. Sclariment pli detagliau dattan duas brevs ord il 18avel tschentaner. En quels dus documents vegn ei rapportau che la signura Anna Margaretha Demonte, naschida Deflorin, sco era il cauderschader e mistral von Mont paghien mintg'onn in tscheins da 135 renchs alla baselgia da Pleiv. Igl ei naturalmein evident che la baselgia da sogn Vincenz era la baselgia dall'entira vallada e consequentamein era responsabla per talas contribuziuns.

Novs proprietaris

In impurtont document anflein nus el 19avel tschentaner. La brev da marcau da 1831 denter las duas partidas Ch. Albertini, J.G. v. Salis-Seewis ed il mistral Seb. Ant. Casura da Falera. In niev proprietari, vendiders nunenconuscents! Documents cun indicaziuns en quei connex, pertgei che dus signurs da Cuera ein proprietaris da Blengias, mauncan deplorablamein puspei. Jeu sundel denton inclinada da pretender che la famiglia Demont hagi giu in temps difficultads finansialas e seigi stada sfurza da saver vender l'alp Blengias ad enconuscents ord lur retschas aristocratas. Quella distaccada dil terren da Blengias ei segir buca stada aschi greva, cun quei che la famiglia Demont da Vella ha mai gudiu directamein senza l'alp. Els devan numnadamein a tscheins l'alp a differents purs.



Blengias Miez, 1949

Cheu in cuort passadi ord la brev da marcau da 1831:

« ... Es verkaufen ... die zuständige Alp Canal, samt dem Berge Bleingias im Lugnetz auf dem Gebiet der Gemeinde Vrin gelegen, in ihrem dem Herrn Landamann Casura wohlbekannten Zielen und Marchen, samt allen dazu gehörenden Geräthschaften laut Verzeichnis ohne Vorbehalt; auch zwey Klafter Heu, welche der dermahlige Beständer zurückgelassen muss, mit Steg und Weg und allem Recht und Genussamen an Holz und Weide, wie diese Grundstücke bis anhin von den Herren Verkäufern besessen und genossen worden, als freyes und unverkümmertes Eigenthum. Und ist dieser Kauf und respective Verkauf geschehen...entsagen die Herren Verkäufer allen diesfälligen weiteren Ansprüchen, und setzen die Käufer in das vollkommene und unbedingte Eigenthum der in diesem Kaufbrief bezeichneten Gegenständen ...»

Dapi 1831 ei la famiglia Casura e ses descendents, pli tard las familias Blumenthal-Riedi, Cabrin, Camenisch, Cavelty e Darms da Falera, proprietaris dall'alp Blengias.

Segir sto u il basegns per terren d'alp, ni la luschezia d'esser proprietari d'ina atgna alp esser stau decisiv per ina tala cumpra. Inclus en quella cumpra eran tut ils stabiliments, stallas e tegias, q.v.d. la tegia da Blengias Sut, Blengias Miez e Blengias Sura sco era las stallas da Blengias Sut ed il Clavau Su.

Entgins onns suenter la cumpra dall'alp ei il proprietari da quei terren, il signur mistral Sebastian Anton Casura sedecidius d'engrondir il terren da Blengias cun cumprar las pendas Mades. Ei setracta cheu da treis pendas ch'appartenevan a differents purs da Vrin. Tgi ch'enconuscha quei territori, tessaglia e malsegir, sa bein capir ch'ils convischins da Vrin, inagada che ina part ha giu vendiu ina penda, ha giu negin interess d'aunc salvar il rest. Aschia ha il mistral Casura giu la caschun da cumprar enteifer treis meins igl onn 1838 tut las treis pendas Mades cunfinontas cul territori da Blengias.

El decuors dils proxims onns dat ei danovamein differents scamonds ed entelgientschas. Ils vendiders da Cuera vevan giu garantiu al mistral Casura il liber possess. Malgrad quella garanzia eis ei semussau che quei liber possess da tuttas grevezias era nuota aschi sempels da realisar. Anteriurs fittaders gudevan per part aunc terren da Blengias ni fagevan valer dretgs da pass e repass. Entras in scamond dil mistral dalla Lumnezia vegnan quellas nunentelgientschas dismissas 1844.

Quei che savess era haver engrevgiau la controlla dils surpassaments en quei territori, ei segir inagada la gronda distanza denter proprietari e proprietad. Da l'autra vart ston ins forsa era veser ch'il persunal d'alp, malgrad lur responsabladad e fideivladad enviars lur patrun, veva negin interess da tgisar ils vischins ch'eran en sesez aschi beinvegni. Tgi ch'enconuscha la val da Vanescha, sias alps e l'isolaziun, capescha che mintga scuntrada muntava in pign eveniment.

In davos document da cumpra datescha da 1932. Quel dat perdetga digl

engrondiment definitiv dall'alp Blengias entras la cumpra dallas Alpettas, l'anteriura proprietad dalla societad da tratga da biestga da Vella. Mo era cheu resalvan ils vendiders il dretg da passar tras l'alp cun lur tiers e quei a caschun dalla cargada e scargada da lur alp Scharboda.

Cun quei document finescha la retscha da scartiras che han da far en ina moda ni l'otra cul terren ni culs proprietaris e possessurs dall'alp Blengias.

Sch'ins dat in sguard anavos san ins constatar che la historia dall'alp Blengias ei fetg interessanta. Duront entgins tschentaners stat l'alp el center digl engaschi dallas differentas gruppas d'interess.

Blengias el temps contemporan

Entochen 1967 han ins era cargau vaccas ed aschia giu in menaschi da caschar ell'alp Blengias. Duront ils onns ch'ins caschava aunc stueva il zezen mintgamai transportar la gudida da l'alp sil bast (cul mél ni cavagl) tochen Vrin. Il caschiel deponevan ins tochen tier la scargada en in tschaler prius a tscheins a posta a Vrin, ferton che la pischada vegneva transportada inagada il meins tochen Falera tiel cautegia.

Dapi 1967 cargan ils pursanavels mo aunc nuorsas, genetschas, mugias e vadials ell'alp. Ils davos 10 onns han ins saviu constatar ina cuntinuada digren dil diember da nuorsas che vegn cargaus. Antruras mavan passa 500 nuorsas en Blengias, oz rodond 200 tocs. Quei che pertucca ils schetgs astgan ins quintar cun biebein 180 tgaus duront la stad ell'alp.

Ozildi existan mo aunc duas tegias ell'alp Blengias, numnadamein la tegia da Blengias Sut e la tegia da Blengias Sura. La tegia da Blengias Miez sepresenta mo aunc cun ses fundaments al viandont. Ina paupra ruina! Ils cuosts per il manteniment da baghetgs che vegnessen aschia ni aschia buca duvrai fussen memia gronds ed aschia ei la historia dalla cascharia da Blengias sin via da svanir ella draussa ed el cagliom sut las pendas Mades.

Igl onn 1976 han ins baghegiu ina nova tegia a Blengias Sut. Cun quella caschun han ins aunc fatg in tetg da stuors sillas stallas che vevan avon tetgs da crap. La tegia da Blengias Sut drovan ils pasturs il temps cuort suenter la cargada e silsuenter aunc in temps avon la scargada.

La tegia da Blengias Sura ei vegnida baghegiada da niev 1974. Per buca destruir la tegia veglia, han ins plazzau la tegia nova da quei da 50 meters sut la veglia, en in liug che pareva bein schurmegiaus da lavinas. Mo tuttina ha la lavina manegiau auter! 1982 ei la tegia vegnida stuschada dalla lavina ed il fevrer 1984 destruida danovamein. In onn pli tard ein ils proprietaris sedecidi da construir ina tegia nova el medem liug nua che la tegia veglia sesanflava.

Tochen 1970 mavan ins cun tut ils animals naven da Falera tochen en Blengias a pei. Ils schetgs e las vaccas catschavan ils purs e lur gidonters da notg anen, ano

denton da di. Las nuorsas semettevan la damaun allas 04.00 uras sin via. Quei valeva per il viadi anen ed ano. Per quella distanza duvravan ins en tut 12 uras. Entras l'augmentaziun dil traffic ei il transport a pei daventaus prigus, fetg stentus e caschunava per part gronds impediments. Aschia ein ils purs stai sfurzai dapi 1970 da transportar lur biestga cun camiuns naven da Falera enta Vrin.

Las nuorsas denton ein idas la davosa gada a pei anen 1983, ferton che per il viadi ano vegnevan ellas era gia transportadas en camiun! Il temps semida e cun el era il carstgaun. Il sforz e la cumadeivladad han perfin midau la veta d'alp!

Conclusiun

Ina da mias finamiras ei stau da rimnar tut il material davart l'alp Blengias ch'ei avon maun, elaborar quels documents ed impedir cheutras la sperdita da quei material. Inclus en quei patratg era naturalmein era il giavisch da saver scriver ina lavur che ha neginas largias. Alla fin hai jeu denton stuiu constatar che beinenqual marcau ei buca staus pusseivels d'eruir cun data, onn e summa concreta. Quei semuossa cunzun tier la midada da proprietaris denter ils vischins d'Aquila e la famiglia Demont da Vella e pli tard denter ils Demonts ed ils signurs Salis-Seewis ed Albertini. Era retschercas supplementaras han buca purtau il success sperau! Entras mias retschercas pli detagliadas sundel jeu vegnida pertscharta con reha e vasta che la historia da Blengias ei insumma. L'alp Blengias ei buca mo in'alp entadem la val Lumnezia, al pei dil péz Terri, mobein in bien ton dapli, ina part da nossa cultura muntagnarda.